



Bentiarq Ottosen
Atassut

UKA 2023/134
17. oktober 2023

Selskabslovip allannngortinneratigut takornarialerinikkut, aalisarnikkut, sanaartornikkut, ussassaarutilerinikkullu suliffeqarfiit nunatta avataaniit pigineqartut immikkut allattorsimaffikkut nalunaarsorneqarsinnaalernissaannut periarfissat pillugit Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UKA2024 nallertinnagu Inatsisartunut agguanneqassaaq.
(Inatsisartuni ilaasortaq Aqqalu C. Jerimiassen, Atassut)

Siullermeernera

Selskabslov allannngortinneratigut suliffeqarfiit nunatta avataaniit pigineqartut nalunaarsorneqarnissaat qulakkeerneqartariaqarpoq, tamanna nalunaarusiornikkut allattorsimaffitsigut naqissuserneqartariaqartoq isumaqarpugut. Uani qulakkeerumallugu nunatta avataaniit suliffeqarfiit tikittut toqqaannartumik nunatta aningaasaqarneratigut kaaviaartitsisumik aningaasat annissorneqarsinnaasut takussutissalersorneqarsinnaammata.

Atassummiit aamma pingaartipparput nunatta avataaniit suliffeqarfiit tikittartut aammalu siunissami suliaratorusullutik tikittussat tikilluaqqunissaat, tassani pingaaruteqarmat suliffeqarfissuit inuussutissarsiornikkut aamma sumiffinni kivitsilluarsinnaanissaat. Taamatut iliornikkut periarfissarpasuit ammaassorneqarsinnaammata.

Qularutigineqassanngilaq nunatsinni suliffeqarfiit aamma salliunneqarnissaat Atassummiit oqaatigiuaratsigit, taakkuupput sumiiffinni kivitsilluarsinnaasut. Upperaarput Atassummiit nunaqavissut suliffeqarfiutillit taakkua tassaammata inoqarfinni annerni mikinernilu kivitsilluartartut tamakkua aamma illersorluarneqarnissaat pingaaruteqarpoq. Namminersortut inuuniuteqaraanni aammalu suliffeqarfiuteqaraanni imminut akilersinnassuseq oqilisarneqartuassaaq, tamanna Atassummiit aammaarluta anguniartuarparput. Kisiannili qitiusumiit aqutsinerujussuup kingunerisarpaa namminersortut suliffeqarfiutaasa artukkerneqarujussuartarneri, tamanna qaangerniarlugu siunnersuuteqartup siunertaa pissusissamisoortutut isikkoqartoq oqaatigisinnaavarput.

Inatsisartutut qulakkeerinnittussaavugut ullumikkut inissisimanerput pillugu nikisitsinissatsinnut, oqartuartarpugummi takornariaqarneq nunatta iluanaarutigisariaqaraa. Tamanna qulakkeertariaqarparput taamaaliornikkut.

Uani pineqartut eqqarsaatigalugit nunatta avammut nittarsaanneqarnera eqqarsaatigineqarsinnaavoq, tassani nunarput orniginarsarneqarluni oqaatigineqartarpoq. Tamakkua aamma eqqarsaatigineqartariaqarput, isumaqarpugummi kisermaassisussaataaneq tamatuminnga aarleqqutigineqarsinnaasoq. Uma siunnersuutip qulakkeertussaavaa avataaniit nunatta nittarsaanneqarnermini iluanaarutit nunatsinnut tunnissaat anguniarlugu suliniutigineqartoq, tamanna inatsisartuni akuersissutigineqarnissaa anguneqartariaqarpoq.

Una siunnersuut ilusimisut isikkoqarluni akuerineqarnissaa innersuupparput.